



**ATASSUT**

**UKA 2015/64**

**Siverth K. Heilmann**

**17. 11. 2015**

**Apeqqu-teqaat aallaavigalugu oqallinnissamik siunnersuut: Qanoq ililluta ineqarnermut aningaasat immikkoortinneqarsimasut atorluarneqarsinnaaneri qulakkeersinnaavagut?**

(Inatsisartunut ilaasortaq Anthon Frederiksen, Partii Naleraq)

Siullertut Partiit Naleraq sinnerlugu Inatsisartunut ilaasortaq Anthon Frederiksen ATASSUT-mit qutsavigissavarput taamatut apeqqu-teqaat aallaavigalugu oqallinnissamik siunnersuummik saqqummiussineranut, tamannalu imatut ATASSUT-mit ima naatsumik oqaaseqarfissavarput:

ATASSUT-ip tunngaviusumik pingaartitarilluinnarpaa sapinngisamik innuttaasut amerlanerpaat nammineq illoqarlutilluunniit ineqarnissaat, tassuunakkut inuunermik toqqissilluni ingerlatsisinnaanermik tunngavilerneqartarmat.

Nammineq illoqarnermi ineqarnermiluunniit angerlarsimaffik nammineq akisussaaffigisarparput, akilersornissaa, asserfallatsaalinnissaa aammalu angerlarsimaffittut ilusilersorlugulu pisatsersornissaa – inuunermut toqqissisimanartumut sinaakutissat taamaasillutik pilersinneqartarput, qasuersaarfigisinnaasatsinnik aammalu nukissanik aallerfigisinnaasatsinnik.

Tamakkuupput ATASSUT-mit pingaartilluinnakkavut inuiaqatigiit nukittuut ineriartortinneqarnissaannut avaqqunneqarsinnaanngitsut. Taamaattumik ATASSUT-mit pingaartilluinnaqqissaarsimavagut illusinermi imaluunniit inissiarsinermi taarsigassarsiat erniasa akileraarutitigut ilanngaatisinnaanerisa allanngortinneqannginnissaat. Akileraarutitigummi ilanngaataasinnaaneri periarfissaajunnaassappat taava initaarniarnissamut kajumissutsip pisinnaanerullu ajorseriaateqarnissaa ATASSUT-mit aarleqqutigigatsigu.

ATASSUT-mit pingaartippavut innuttaasut sapinngisamik nammineq initaarnissaminnut illutaarnissaminulluunniit kajumissaaserneqartuarallarnissaat, taamaattumik aamma angajoqqaat



meeqqaminnut ileqqaagaqartitsisarnissaat kajuminnartuujuartariaqarpoq, soorlu Grønlandsbanken aqutigalugu NanoqKonto-qarsinnaaneq, tassuunakkummi aallarniutaasumik initaarniarnermut periarfissanik ammaassisuullunilu oqilisaataasinnaalluarmat – aammalumi NanoqKonto-p erniakkaajuneratigut ileqqaagaqartarnissamut kajumissaataalluurluni.

ATASSUT-mit isumaqarpugut namminneq initaarnissaq illutaarnissarluunniit kajuminnartuaannartuusariaqartoq, tassuunakkummi init attartorneqarsinnaasut nammineq arlaatigut peqquteqarluni namminneq initaarnissamut illutaarnissamulluunniit periarfissaqanngitsunut imaluunniit attartuinnarusuttunut periarfissanik ammaassisarmat.

Taamatut ATASSUT-mit naatsumik oqaaseqarluta Naalakkersuisup akissuteqarneranut qutsavigissavarput.